

## Tia sinte iyi Pɔlu í kɔa Timotee

### *Pɔlu í ce Timotee fɔɔ*

<sup>1</sup> Amu Pɔlu ñ wa n ceε fɔɔ, amu iyi ñ je woo bei Jesu Kirisi. Ilaaɔ woo faaba nwa do Jesu Kirisi, nɲu iyi à waa cɔ kpãae, aɲai à jilɔɔ si n je woo be.

<sup>2</sup> Ñ ceε tiau ihē wai Timotee, awɔ iyi ñ ye bei ama abím si kpãai naane ku dasi. Ilaaɔ Baaba do Jesu Kirisi Lafēε nwa a ce araareε a muue didɔ do laakai ku sũ.

### *I ce laakaii woo kɔsi cio ilu ibo ɲa*

<sup>3</sup> Nsei, ñ bi i buba Efεεzu si bei ñ sãε wo si waati iyi ñ bɔ ilei Masedɔni. Inε gɔ ɲa à wa be iyi à waa kɔ inε ɲa si cio mmu. Ganji ɲa.

<sup>4</sup> Sɔ ɲa a maà ti a dasi laakai ɲa si ide ɲa iyi inε ɲa à bu à waa fɔ do irii bala nwa ɲa iyi à ya maa de ku mà. Nɲu ɲau bei wa naaɔ kakɔɔ ɲa wa, kaa nɔ kù mua inε ɲa gbugbã si naane ku dasi ɲa icei Ilaaɔ ku bei ku bɔ waju.

<sup>5</sup> Amma mii iyi à waa le à waa sɔ ɲεò ideu ihēi í je kubi ɲεε ku kɔsi, kubi iyi wa naa hai si idɔ iyi í má, do idɔ hai nε taale.

<sup>6</sup> Wee inε gɔ ɲa à yaa hai si ideu ihē nɔ à koo à lɔ si kakɔɔ nfe ku ce.

<sup>7</sup> À bi aɲa a je woo kɔ inε ɲa si cioi woodai Ilaaɔ, amma aɲa taka ɲa a kù mà yaasei ide iyi à waa fɔ baa do iyi à waa fɔɔ do naane nla nla.

<sup>8</sup> Awa à mà iyi wooda í sĩa bii amanε ɲa à waa ceò ice si bei í jɔ.

<sup>9</sup> Nɔ à mà iyi a kù jilɛ wooda na inɛ dee dee na. À jilɔɔi na woo donda wooda na, do hai gbɔ ide na, do ilu dulum na, do inɛ na iyi a kù mà bæɛɛi Ilaaɔ walakɔ mii na iyi à jɛ tɛɛ, do inɛ na iyi à waa kpa iyeò baa nna na, do woo kpa inɛ na,

<sup>10</sup> do woo ce sakara na, do inɛ mɔkɔ na iyi à ya maa sũò nje, do inɛ na iyi à waa ce inɛ na ile à waa ta, do woo sɔ ibo na, do woo ceekpe si ibo na, do inɛ na iyi à waa ce mii baa yooma fei iyi kù waa too si cio jiidɔ.

<sup>11</sup> Cio jiidɔu í naai hai si laabaau jiidɔu iyi à daam si awɔ. Ilaaɔ ilu amboei iyi í ya weea inɛ nai laabaau jiidɔu wa fãa.

### *Í saabu Ilaaɔ na araaree*

<sup>12</sup> Ñ saabu Jesu Kirisi Lafɛɛ nwa, nɔu iyi í muum gbugbã ñ ceò icɛm. Ñ saabuɛ si na iyi í jò í kam ilu naanɛ nɔ í cicaam si icɛɛ,

<sup>13</sup> baa do iyi ñ ya n maa n fɔ laalɔe wo nɔ ñ ya n maa n kpãa iju nɔ idɔɔkɔm ci ya jì. Do nɔu fei, í ce araarem si bei n kù mà mii iyi ñ wa n ce, si na iyi í jò n kù dasiɛ naanɛ wo.

<sup>14</sup> Nɔ wee didɔi Lafɛɛ nwa í caa sim, nɔ í jò ñ dasiɛ naanɛ nɔ ñ nɛ kubii inɛ na.

<sup>15</sup> Ide ilu naanɛi iyi í jò i yɔ awɔ i gba na mam mam. Ideu wee. Jesu Kirisi í naai si andunya ku faaba ilu dulum na. Amui ñ re na do dulum,

<sup>16</sup> amma Ilaaɔ í ce araarem ku ba Jesu Kirisi ku yɔkɔ ku nyisi temua hai nɛ kɔɔɛ si amu iyi ñ jɛ inɛ ngboi ilu dulum na. Nɔ ñ bi n jɛa inɛ na iyi aa na a dasiɛ naanɛ a ba kuwɛɛ hai tã yaase jiidɔ.

17 Ilaaḏ nḡu akāi í je ilaalu hee do aḵo fei, ci ya ku nḵ a ci ya yḵo do iju. Ka saabuε nḵ ka mà bæεεε hee do aḵo fei. Ami.

18 Timotee amam, ide iyi n̄ wa n̄ jilεε wee si bæi à ce waliie wo na iriε. Jḵo idei waliuu ku je j̄ineí igũε iyi aa maa jabuḵo i ceḵo igũ jiida.

19 Leekí dim dim si naane ku dasiε nḵ i maḵo ce nkāma iyi á jḵo idḵε ku ye taaleε. Amma ine gḵo ḡa ngu ḡa à kḵo ku gbḵo lasabu jiida iyi idḵo nḡa wa sḵo ḡa nḵ à jḵo naane ku dasi nḡa í ce nfe.

20 Si inḵo nḡai Himenee do Alesandu à wa, nḵ n̄ so ḡa n̄ daa Seetam si awo ku ba a mà iyi kḵo s̄la a maa fo laabi Ilaaḵ.

### *Idei kutḵo*

## 2

1 Mii sinte iyi n̄ wa n̄ tḵo ḡei í je i ya ce kutḵo ḡa. Mii iyi ì nε bukaataε fei, i ya tḵo Ilaaḵ ḡa nḵ i ya ce kutḵo na irii ine fei ḡa nḵ i ya saabu Ilaaḵ na iri nḡa ḡa.

2 Nḵo i ya ce kutḵo ḡa na irii ine ngboi ilε ḡau hee do inei anyi nḡa ḡau fei, ku ba ka yḵkḵo ka je andunya nwa do laakai ku sũ, nḵ ka ya ce kuwεε jiida ku ba ine ḡa a mà bæεεi Ilaaḵ.

3 Dimii kutḵo bæεbei í s̄la nḵ í ya dḵa Ilaaḵ woo faaba nwa si.

4 Í bi bæεbei domi í bi ine fei ku ba faaba nḵ ku mà ntḵo.

5 Ntḵo ntḵo Ilaaḵ akāi í wεε, nḵ ine akā mḵi í wa si afei Ilaaḵ do amanε ḡa ku ba ku jḵo amanε ḡa a dḵo do Ilaaḵ. Laf̄εu nḡui í je Jesu Kirisi, nḡu iyi í baa í je amanε,

<sup>6</sup> Nɔ́ í na araε ku yaò inε fei hai si dulum dεε. Bεεbei si waati jiidæ í nyisi wa iyi Ilaaõ í bi amanε fei ku ba faaba.

<sup>7</sup> Na nηui Ilaaõ í cicaam n je woo waazo do woo bε, nɔ́ n kɔ́ dimi mmu ηa si cio si ide ntɔ́ nɔ́ n sɔ́ ηa a dasi Jesu naanε. Ntɔ́i n̄ wa n fɔ́ n kù wa n sɔ́ ibo.

<sup>8</sup> Na nηu, tengi bii à ya ce kutɔ́ ηa fei, bii inεmɔ́kɔ́ ηa à wu awɔ́ lele à waa ce kutɔ́, n̄ bi ku ya je do idɔ́ kumá, idɔ́kɔ́ do kakɔ́ ku maà ya wasi.

<sup>9-10</sup> Bεεβε mɔ́i n̄ bi inaabo ηa a ya dasi j̄ine ku nε bεere ηa si azaka. Í s̄ia booda nηa kú je kookoosu j̄ida si bei í jɔ́ inaabo ηa iyi à ni aηa à mà bεerei Ilaaõ a ya ce, ku maà ti ku je do iri kubai faayi walakɔ́ do sabai wura ηa walakɔ́ do lege ηa, nɔ́ a maà ya dasi j̄inei fia nkpɔ́ nkpɔ́.

<sup>11</sup> Í s̄ia inaabo ηa a gbɔ́ ciou si laakai do jirima mam mam.

<sup>12</sup> N̄ kù je inaabo ηa a kɔ́ si cio walakɔ́ a je inε ngboi inεmɔ́kɔ́ ηa. Amma í s̄ia a ya maa coko.

<sup>13</sup> N̄ wa n fɔ́ bεεbei si na iyi í jɔ́ Adamui Ilaaõ í tako í taka í bei í taka Efa.

<sup>14</sup> Nɔ́ kù je Adamui Seetam í d̄i ijuε. Ijuí aboεi í d̄i nɔ́ abou í kua woodai Ilaaõ.

<sup>15</sup> Amma inaabo ηa aa ba faaba si kp̄ai ama ku bí bii à waa mu ara nηa nɔ́ à leek̄i si kp̄ai naanε ku dasi do kubi do kuwεε iyi í má.

*Inε ngboi inεi igbei Jesu ηa*

### 3

<sup>1</sup> Ide ilu naanε wee. Bii inε gɔ́ í bi nηu ku je inε ngbo si igbei inεi Jesu ηa, ice j̄idai í bi.

<sup>2</sup> Í s̄ia laf̄ɛɛ ku maà nɛ taale gɔ nɔ ku nɛ abo akã lege lege, si anyiɛ nɔ ku je inɛ gɔ iyi í ya saku nɔ ku mà arae, ku maà je amane yaka yaka, amma ku je inɛ gɔ iyi í ya yaaɛ inɛ njoo ña nɔ ku je inɛ gɔ iyi á yɔkɔ ku kɔ inɛ ña si cio.

<sup>3</sup> Nɔ ku maà je woo mɔ at̄ɛ walakɔ woo bi ija, amma ku je ilu suuru iyi wa de laakai ku s̄u, nɔ ku maà je woo bi fia yaamɔ.

<sup>4</sup> Nɔ ku je inɛ gɔ iyi í nɔ kpas̄ɛɛ mam mam, nɔ amae ña à ya jirimae nɔ à mà beɛrei inɛ ña.

<sup>5</sup> Ntɔ ntɔ, bii inɛ kù mà bei á ce ku mu kpas̄ɛi n̄ju takae, beirei laf̄ɛɛ á ce ku mu inɛi igbei Ilaaã ña.

<sup>6</sup> Nɔ kù s̄ia ku je inɛ iyi í dasi Jesu naane tit̄ɔ tit̄ɔ, domi á yɔkɔ ku na ku nɛ faau nɔ Ilaaã á ye taaleɛ bei í ye taalei Seetam.

<sup>7</sup> Si anyii n̄ju, í s̄ia hai dasi Jesu naane ña a máa je seeda jiidae ku ba a maà dondae, nɔ ku maà na ku dasi cekũm dii Seetam.

### *Woo ce icei igbei inɛi Jesu ña*

<sup>8</sup> Beɛbe m̄oi woo ce icei igbei inɛi Jesu ña á s̄ia a je inɛ ña iyi à nɛ beɛɛɛ, a maà ti a je ilu gele minji ña, walakɔ woo mɔ at̄ɛ yaamɔ, walakɔ woo de fia do bisi laalɔ.

<sup>9</sup> Amma í s̄ia a leek̄i dim dim si naane ku dasi do idɔ iyi í má.

<sup>10</sup> Nɔ í s̄ia a cɔ laakai ña tit̄ã. Bii à ye a kù nɛ taale gɔ a bei a l̄osi ice n̄ja ku ce.

<sup>11</sup> Beɛbe m̄oi í s̄ia abo ña ña a je inɛ ña iyi à nɛ beɛɛɛ, nɔ a maà je woo sɔ irii inɛ, amma a je woo gaya ña iyi à nɛ naane si mii fei.

<sup>12</sup> Í sía woo ce icei igbe ηau a je ilu abo akã lege lege nɔ a je ine ηa iyi à nɔ ama nηa ηa do inei kpasẽ nηa ηa mam mam.

<sup>13</sup> Woo ce ice ηau, bii à waa ce ice nηa do inɔ akã aa ne beere si kuwee nηa, nɔ aa ne idɔ ku buba ntɔ ntɔ si naane ku dasi iyi Jesu Kirisi wa mu nwa.

### *Asii nla nla*

<sup>14</sup> N̄ dasi idɔ n naa n yee, amma n̄ kɔe tiauh ihẽ wai

<sup>15</sup> ku ba baa bii í na wa kpei, i mà bei í jɔ inei nyaanzei Ilaaɗ ηa a maa neɔ ara nηa, waatɔ inei igbee ηa, nηu iyi í je icui kuwee. Igbui í ye bei sɔbei ntɔu do gbugbãe.

<sup>16</sup> Do ntɔ, ine gɔ kù wee iyi á yɔkɔ ku jã kulai asiii kpãai Ilaaɗ ku tɔɔ nwa.

Kirisi í baa í je amanɛ nɔ à yɔɔ,

Nɔ Hundei Ilaaɗ í jɔ à mà iyi ine dee dee.

Amaleka ηa mɔ à yɔɔ.

À waaɔo ideɛ si dimi baa yooma fei.

Nɔ à dasi ideɛ naane si andunya.

Nɔ à soo lele í nyi si amboeɛ.

### *Woo kasi cio ilu ibo ηa*

## 4

<sup>1</sup> Hundei Ilaaɗ í fɔ dee dee í ni si awaatii ankãanyi ine gɔ ηa aa jɔ kpãai naane ku dasi, a máa jirima idei woo dí ijui ine ηa do kukasii Seetam.

<sup>2</sup> Dimii kukasi nηu wa naai hai bi ilu muafiti ηa do woo sɔ ibo ηa. Ine ηau à lele idɔ nηa hee ci ya ye taale nηa má.

<sup>3</sup> Amanɛ dimi beɛbe ηai à ya ni kù sía ine ηa a so nje. Nɔ à ya nyi a ni má ije gɔ ηa à wee iyi kù sía ine

ηα a jɔɔ, baa do iyi ije ηau Ilaaɔ́ í taka ηai ku ba woo dasie naane ηa iyi à mà ntɔu a ya jɔɔ do saabu ajɔ.

<sup>4</sup> Nkāma kù wa si iyi aa nyɔ, domi mii iyi Ilaaɔ́ í taka fei mii jiidai, nɔ́ í sía ka gba fei ndεε do saabu.

<sup>5</sup> Ntɔ ntɔ, mii fei í máí bii à waa ceò ice do yaase bei idei Ilaaɔ́ í fɔ do bii à waa ce kutɔɔ.

### *Woo ce ice jiidai Jesu Kirisi*

<sup>6</sup> Bii ì waa kɔa woo dasi Jesu naane ηa si bisiu ihɛ, aa jε woo ce ice jiidai Jesu Kirisi, nɔ́ naane ku dasi do idei kukɔsi jiidai iyi ì waa too si á yei bei ije iyi ì waa na hundee.

<sup>7</sup> Amma kɔsi ará hai ne yaase ηa iyi a kù waa too si idei Ilaaɔ́. Hanya i ce kuwεεε si bei á dɔa Ilaaɔ́ si.

<sup>8</sup> Ntɔi, icei ara aranfāaniε kù la, amma idei Ilaaɔ́ ku leekí si í ne aranfāani si mii fei, domi si bei à ne kuwεεi nsei do ti ala.

<sup>9</sup> Ide iyi à fɔu be ide ilu naanei iyi í jɔ́ i yɔ awɔ́ i gba ηa mam mam.

<sup>10</sup> Na ηoi í ce à jabu à waa ceò ice, domi kpāa ku cɔ nwa si Ilaaɔ́ í wa, nηu iyi í jε icui kuwεε, nɔ́ í jε woo faabai ine fei, woo dasi Jesu naane ηa mɔm nii à re.

<sup>11</sup> Sɔ́ ηa a jirima mii ηau ihɛ nɔ́ i kɔ́ nηa si cioε.

<sup>12</sup> Maà ti i jò a dondaε na awaasū ku jεε, amma jò i nyisi woo dasi Jesu naane ηa yaase jiidai si ide ku fɔε, do kookoosui kuceε, do kubiε, do naane ku dasie, do dee dee ku jεε.

<sup>13</sup> Hee n maa n to wa, hanya i ka kukɔi idei Ilaaɔ́, nɔ́ i kɔ́ ine ηa si, nɔ́ i ce waazoε.

<sup>14</sup> Maà ti i ce atafii si amua iyi í wa sie, iyi Hundei Ilaaɔ́ í muεε si waati iyi à ce walii na iriε nɔ́ ine ngboi igbei Jesu ηa à lee awɔ́ si iri.

<sup>15</sup> Laakaie fei ku wa si ideu ihɛ, nɔ́ i naa araε mam mam ku ba ine fei ku ye waju ku bɔε.

16 Ce laakai do bei ì waa je kuwεεε do cio iyi ì waa kò si nò i ya maa temua si. Bii ì waa ce beεbe, aa ba faaba, awò do ine ña iyi à waa gbò ideε.

*Isenei woo dasi naane ña anja duusò*

## 5

1 Maà ya fò si məkò ngbo ña ide do gbugbã, amma jò i ba ña ide ku fò kpele kpele bei baai awò takae. Nò i cea awaasũ ña bei ifòe ña do igbãe ña,

2 abo ngbo ña mò bei iyee ña, nò inaabo saatarã ña mò i ce ñja bei wecfe ña, daae fei kú má bi tu ña.

3 Gbòã jaað ña nò i mà beere ñja, anja iyi à je jaað do ntò.

4 Amma bii jaað gò í ne amu ña wala taku ña, í sĩa amae ñau a woo bei ñju mò í tako í ce ñja. Bii à waa ce beεbe à waa cea Ilaað icei, nò ñjuí á dĩa Ilaað si.

5 Inaabo iyi í je jaað do ntò nò kù ne ine gò iyi á woo, kpãã ku cæ fei si Ilaaði í ya wa nò í ya maa ce kutò ku maa tò sobie dasàò idũ.

6 Amma jaað iyi wa je andunyaε do faayi í ye bei iku baa bii í weε si hunde.

7 Ide ña iyi aa ya maa sò ña mbe ku ba ine gò ku maà ye taale ñja.

8 Ine iyi kù waa gbòã nyaanzeε ña, iyi í re məm inei kpasεε ña, lafεε í kəsi naane ku dasi, nò laalò ku jeε í re baa hai dasi Jesu naane.

9 Maà ti i kò irii jaað gò si tia bii à ya kò irii jaað ña \* bii kù je lafεε í ne adò kita, nò kú je ilu məkò akã,

---

\* **5:9** tia bii à ya kò irii jaað. Si tiau bei à ya kò irii jaað ña iyi à jesi anja a maà so məkò má nò a na kuweε ñja a ceað Ilaað ice hee kòsi kuweε ñja. Anjai inei igbei Jesu ñau à ya na bukaatai mii iyi à ne.



10 nɔ ku jɛ inɛ gɔ iyi à waa jɛ sɛɛdai icɛ jiidaɛ. Nɔ ku jɛ inaabo iyi í mà amu ɲa ku mu, nɔ ku jɛ inɛ gɔ iyi í ya yaaɛ inɛ njoɔ ɲa nɔ ku wiɛ kutei woo dasi Jesu naanɛ ɲa †, nɔ ku ya sobi inɛ ɲa iyi a wa si wahala, nɔ kú jɛ inɛ gɔ iyi í ya ce icɛ jiida baa yooma fei.

11 Amma maà ti i doo jaaɗ saatara ɲa si inɔi jaaɗ ɲa, domi waati iyi kubi á tale ɲa aa ce Kirisi atafii, aa bi a so mɔkɔ

12 nɔ aa jɛ ilu taale ɲa si na iyi í jò a kù ceò ide iyi à wāu icɛ.

13 Si anyiɛ nɔ aa nɛ ìkà a ya maa dabii dabii kpasɛ do kpasɛ. Iyi í re mɔm, aa ya maa sɔ irii inɛ ɲa nɔ a ya maa gū wɔbia nɔ aa jɛ woo sisi ide ɲa.

14 Na nɲu ɲau bei í jò ò bi jaaɗ saatara ɲa a so mɔkɔ a bí ama, nɔ a dasi kpasɛ nɲa iju jiida, ku ba a maà na a mua mbɛɛ nwa ɲa kpāa a fɔ laalo nwa.

15 Ntɔ ntɔ jaaɗ ɲau, gɔgɔ ɲa à yaa tã à waa too kpāai Seetam.

16 Amma bii woo dasi Jesu naanɛ gɔ í nɛ jaaɗ ɲa si nyaanzeɛ, í sɪa ku sobi ɲa, ku maà ti ku kãa igbei inɛi Jesu ɲa asou ku ba igbɛu ku yɔkɔ ku sobi jaaɗ ɲa iyi a kù nɛ inɛ gɔ.

17 Si anyii nɲu, inɛ ngboi igbɛ ɲau iyi à waa ce icɛ jiida, í sɪa i doo ɲa ilu bɛɛɛɛ iyi à nɛ aranfãani nla nla. Iyi í re mɔm nɲui í jɛ inɛ ɲa iyi à waa ce kookaai si waaɔo do cio ku kɔsi.

18 Kukɔi idei llaaɗ wa fɔ í ni, i maà ti i dī gɛlei ketɛ iyi wa jojo si bilee wa nya yɔyɔɛ. Nɔ wa fɔ má í ni, woo ce icɛ í nɛ kpāa ku gba fiaɛ.

---

† 5:10 ku wiɛ kutei woo dasi Jesu naanɛ ɲa Bi Zuifu ɲa bii inɛ gɔ í naa kpasɛ ɲa à ya wiaa kutei bei awa mɔ à ya ka muaa inɛ inyi ku mɔ. Amma bi Zuifu ɲau, arui í ya wiɛ kutei inɛ njoou.

<sup>19</sup> Bii à aa à s̄ε taale iyi inε ngboi igbε gɔ́ í ce, maà ti i jesi ideu, bii kù je amanε minji wala mεeta í je sεεd̄aε.

<sup>20</sup> Inε ηa iyi à waa ce dulum, s̄o ηa si wajui inei igbε ηau fei ku ba inε ηa iyi à gbe a ce njo.

<sup>21</sup> Ñ wa n t̄oε si wajui Ilaā do Jesu Kirisi do si wajui amaleka kumáε ηa, gbɔ̄ idei kukɔ̄siu ih̄ε, maà ti i ce njo i jui inε gɔ̄. Nɔ̄ i maà ti i ce ngɔ̄gɔ̄ na kubii kpaasi.

<sup>22</sup> Maà ti i saasa i lea inε gɔ̄ awɔ̄ si iri ku ba i maà nε ikp̄ε si dulum dii inε gɔ̄. Fa araε hai si dulum.

<sup>23</sup> Maà ya mɔ̄ inyi n̄ηu akā, amma i ya mɔ̄ v̄εε keeke na baanii in̄ε si na iyi í j̄ò i ci ya fε b̄ō.

<sup>24</sup> Dulum dii inε gɔ̄ ηa í ya fitai gbasasa a bei a kiiti ηa. Amma ti inε gɔ̄ ηa í ya fitai do ankāanyi.

<sup>25</sup> Bεεbε m̄ai icε jiida m̄o í ya fitai gbasasa, nɔ̄ baa bubuε iyi a kù ȳō waati bεεbε, kaa manji do aj̄ō fei.

## 6

<sup>1</sup> Inε ηa iyi à je aru fei í s̄la a doo laf̄εε n̄ηa ηa ilu jirima ηa si mii fei, ku ba inε gɔ̄ ku maà ba faya ku f̄ō taalei irii Ilaā walakɔ̄ kukɔ̄si nwa.

<sup>2</sup> Aru ηa iyi à nε laf̄εε woo dasi Jesu naane ηa a maa donda ηa a ni āηa à je saa na saabui Laf̄εε. Amma si na iyi í j̄ò inε ηa iyi à waa je aranf̄aanii icε n̄ηau à je woo dasi Jesu naane ηa iyi Ilaā í bi, n̄ηui í j̄ò í s̄la a ce n̄ηa icε ku re. Mii iyi í s̄la i waazo n̄ηa mbe nɔ̄ i kɔ̄ ηa si cioε.

### *Kukɔ̄si ibo do amani jiida*

<sup>3</sup> Inε iyi wa k̄oa inε ηa si cio mmu gɔ̄ nɔ̄ kù waa too ide nt̄ai Laf̄εε nwa Jesu Kirisi iyi á j̄ò ka mà bεerei Ilaā,

<sup>4</sup> lafɛɛ ilu faau nla nlai, kù mà nkāma. Amma wa ce bɔ̃ɔi kakɔɔ do ide ku fengee. Nɔ hai bei igu do ija do arabu wa naa, nɔ nɲui í ya jò ine ɲa a ci ya naane nɲe.

<sup>5</sup> Nɔ í jò irii ine ɲa í sinda a kù mà ntɔ, à ya maa ce kakɔɔ hai ne kɔɔ. À tamaa kpāai idei Ilaaɔ ku too á ce ɲa ilu amani ɲai.

<sup>6</sup> Ntɔi, kpāai idei Ilaaɔ ku tɔɔ amani nla ɔɔi, bii amanɛ í saabu si mii iyi í ne.

<sup>7</sup> Ntɔ ntɔ, a kù naaò nkāma wa si andunyau ihɛ, nɔ bɛɛbɛ mɔi a kaa ka ɲèò nkāma.

<sup>8</sup> Na nɲu, bii à ne ije do nyau ɲa á sɪa ku to wai wo.

<sup>9</sup> Amma ine ɲa iyi à waa bi aɲa a je ilu fia nla, à ya dasi kulelei, nɔ bine laalɔ nkpɔ nkpɔ hai ne yaase a mu ɲa bei cekūm nɔ ku sɔsi ɲa si ina iyi ci ya ku a ce nfe.

<sup>10</sup> Bɛɛbei á ce si na iyi í jò kubii fia í je icāi laalɔ ikā ikā baa yooma fei. Nɲui ine ɔɔ ɲa à lɔsi ku de hee à yaa hai si kpāai naane ku dasi, à baa à dasi ara ɲa si kpāai wahala.

### *Iyi Pɔlu í dasi Timotee ku ce*

<sup>11</sup> Amma awɔ iyi ì je ti Ilaaɔ, saa mii ɲau be fei. Nɔ i lele kpāai dee dee ku je do bɛɛɛɛi Ilaaɔ ku mà do naane ku dasi do kubi do temua do daa didɔ.

<sup>12</sup> Jabu jiida si kpāai naane ku dasi. Leekɪ dim dim si kpāai kuwɛɛ hai tã si bei Ilaaɔ í kpee. Na kuwɛɛui ì je sɛɛda jiida si wajui ine nkpɔ.

<sup>13</sup> Ñ wa n sɔɛ si wajui Ilaaɔ, nɲu iyi wa na mii fei kuwɛɛ, do si wajui Jesu Kirisi, nɲu iyi í je sɛɛda jiida si wajui Pɔnsu Pilati,

<sup>14</sup> jirima woodau, nɔ kuwɛɛɛ ku maà nɛ riisi do taale gɔ hee ku toò ajɔ iyi Lafɛɛ nwa Jesu Kirisi á faata wa.

<sup>15</sup> Ilaaã, nɔɔ iyi í jɛ icui inɔ didɔ fei, á jò ajɔɔ ku to wa si waatiɛ. Nɔɔ akã lege legei í nɛ yiiko si mii fei, nɔɔi í jɛ ilaalui ilaalu ɔa, do Lafɛɛi lafɛɛ ɔa.

<sup>16</sup> Nɔɔ akãi í jɛ inɛ iyi ci ya ku. Nɔ í wa si inya kumá iyi inɛ gɔ kaa yɔkɔ ku maai si. Inɛ gɔ kù yɔɔ, nɔ inɛ gɔ kaa yɔkɔ ku yɔɔ mɔm. Nɔɔi í nɛ bɛɛɛ do gbugbã iyi ci ya tã. Ami.

<sup>17</sup> Sɔ ilu amani ɔa a maà ti a tɔɔ fufu, nɔ naane nɔa ku maà wa si amani iyi á na ku tã, amma a jò naane nɔa ku wa si Ilaaã, nɔɔ iyi wa mu nwa fei ndɛɛ do inɔ akã ku ba ka wɛɛɔ inɔ didɔ.

<sup>18</sup> Sɔ ɔa a ce mii iyi í sɔa, a jɛ ilu amani si jiidai ku ce, nɔ a ya kpɛa inɛ ɔa amani nɔa do inɔ didɔ.

<sup>19</sup> Bɛɛbɛi aa singaa ara nɔa amani jiidai ala iyi kaa bɛjɛ nɔ a ba kuwɛɛ iyi í jɛ kuwɛɛ do ntɔ.

<sup>20</sup> Timotee, ide iyi à daɛ si awɔu, muu ku sɔa. Fa araɛ hai si ide nfe nfei andunya. Maà ce kakɔ do inɛ ɔa iyi à waa tamaa aɔa à nɛ kumà.

<sup>21</sup> Kumàui inɛ gɔ ɔa à waa ni aɔa à nɛ, nɔɔi í jò à nyɔ hai si kpãai naane ku dasi.

Didɔi Ilaaã ku wɛɛ do inɛ.

## **Akabuu Titõi Idei Ilaa** **Monkole New Testament**

copyright © 2006 SIM International

Language: Monkole (Mokole)

Translation by: SIM International

### **Monkole, Akabuu Titõi Idei Ilaa**

This translation, published by the UEEB/SIM au Benin, was published in 2006.

If you are interested in obtaining a printed copy, please contact the SIM, BP 15, Parakou, Benin.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

596bf1bc-1348-53da-8787-98c1d2a18282